

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

दिनांक 28.09.2024

18.10 शनिवार

प्रमुख समाचार –

1— केंद्रीय जल सक्ति मंत्री सी.आर.पाटिल अउ मुख्यमंत्री ह आज राजनांदगांव जिला म ग्रामीण औद्योगिक पार्क म संचालित प्लास्टिक वेस्ट मैनेजमेंट यूनिट के करीन निरीक्षण।

2— “स्वच्छता ही सेवा” अभियान के चलत प्रदेश म स्वच्छता ले जुड़े कतकोन गतिविधि होवत हे – इही बीच पद्मश्री राधेश्याम बारले ह ‘स्वच्छता ही सेवा’ अभियान ले जुड़े के अपील करे हे।

3— प्रधानमंत्री ह काली बिहनिया ग्यारा बजे आकाशवाणी म “मन की बात” कारीकरम करइया हे— ए कारीकरम के ए ह एक सौ चौदहवां कड़ी होही

समाचार विस्तार ले

केंद्रीय मंत्री—राजनांदगांव

केंद्रीय जल सक्ति मंत्री सी.आर.पाटिल अउ मुख्यमंत्री विष्णुदेव साय ह आज राजनांदगांव जिला के अमलीडीह गांव के ग्रामीण औद्योगिक पार्क म संचालित प्लास्टिक वेस्ट मैनेजमेंट यूनिट के निरीक्षण करीन। ए बेरा म ओमन ह प्लास्टिक कचरा के पर्यावरण संरक्षण बर माईलोगिन मनके समूह कोति ले करे जात कोसिस के तारीफ करीन।

ए बेरा म केंद्रीय मंत्री श्री पाटिल ह किहीन हे कि माईलोगिन मनके समूह ह प्लास्टिक कचरा ल रिसाइक्लिंग करे के जउन कदम उठाय हे, ए ह पर्यावरण ल बचाय के दिसा म अच्छा साबित होही।

उहें, मुख्यमंत्री ह किहीन हे कि महिला समूह के सदस्य मन ह अपन बिसेस प्रयास ले पर्यावरण ल बचाय खातिर अच्छा काम करत हे ।

एखर ले पहिली केंद्रीय मंत्री श्री पाटिल अउ मुख्यमंत्री श्री साय ह राजनागांव विकासखंड के बरगा गांव म आयोजित स्वच्छता ही सेवा कारीकरम म सामिल होइन । ए बेरा म ओमन ह परकुलेशन टैंक साईट, स्वच्छता लक्षित इकाई अउ जिला प्रशिक्षण केंद्र के निरीक्षण करे के संगेसंग पौधा रोपण घलो करीन ।

स्वच्छता ही सेवा

“स्वच्छता ही सेवा” अभियान के चलत प्रदेश म स्वच्छता ले जुड़े कतकोन गतिविधि होवत हे । इही बीच दुरुग जिला के रहइया जाने माने पंथी लोक नर्तक अउ पद्मश्री राधेश्याम बारले ह ‘स्वच्छता ही सेवा’ अभियान ले जुड़ के अपन घर अंगना अउ तीर-तखार के सफई करे के अपील करे हे ।

उहें, ए अभियान के चलत शासकीय विज्ञान महाविद्यालय मुंगेली म घलो राष्ट्रीय सेवा योजना-एनएसएस के लइका मन ह स्वच्छता जागरूकता रैली निकालीन । ए बेरा म स्वच्छता ले संबंधित निबंध अउ रंगोली प्रतियोगिता के आयोजन घलो होइस ।

मन की बात

प्रधानमंत्री नरेंद्र मोदी ह काली बिहनिया ग्यारा बजे आकाशवाणी म “मन की बात” कारीकरम करइया हे । मन की बात कारीकरम के ए ह एक सौ चौदहवां कड़ी होही । ए कारीकरम ल आकाशवाणी अउ दूरदर्शन के सबो नेटवर्क, आकाशवाणी समाचार वेबसाइट अउ न्यूज ऑन एआईआर मोबाइल ऐप म प्रसारित करे जाही । एला

आकाशवाणी समाचार, डीडी न्यूज, पीएमओ अउ सूचना अउ प्रसारण मंत्रालय के यूट्यूब चैनल म घलो सीधा प्रसारित करे जाही। हिंदी प्रसारण के तुरते बाद आकाशवाणी ह क्षेत्रीय भाखा म घलो एला प्रसारित करइया हे।

एनआईए-छापा

राष्ट्रीय जांच एजेंसी एनआईए के टीम ह कांकेर जिला के मुजालगोंडी, कलमुचे, आमाबेड़ा अउ जिवलामारी गांव म चार आने-आने जघा म छापा मारे हे। टीम ह माओवादी मन ले कथित संबंध के जांच ल लेके, एक झिन उंहे के रहइया पत्रकार के घर म घलो छापा मारिन। ए कार्रवाई के फिलहाल पूरा जानकारी नइ मिल पाय हे।

जानबा के अनुसार पाछू दिन प्रदेस म एक झिन भाजपा नेता के हत्या के जांच के चलत एनआईए ह प्रदेस के कतकोन ठिकाना म छापा मारे रिहीस। ए बेरा म कांकेर जिला के एक दर्जन ले जादा गांव म जाके दू झिन मनखे ल गिरफ्तार घलो करे गे रिहीस जेमा आरोपी मन करा ले कतकोन आपत्तिजनक दस्तावेज अउ नगदी पइसा मिले हे।

अरुण साव-समीक्षा

उपमुख्यमंत्री अउ लोक निर्माण मंत्री अरुण साव ह आज जगदलपुर म बस्तर संभाग के सबो जिला के अधिकारी मनके बइठका लेके रद्दा बनाय अउ आने काम के समीक्षा करीन। ए बेरा म ओमन ह निर्माण काम म तेजी लाय के निरदेस दीन।

राष्ट्रीय पोषण-माह

राष्ट्रीय पोषण माह के तहत ए दिन प्रदेश के आंगनबाड़ी केंद्र मन म आने-आने गतिविधि संचालित करे जावत हे। प्रदेश म अब तक पंचानवे लाख छत्तीस हजार ले जादा गतिविधि मनके आयोजन करे जा चुके हे।

इही बीच, सूचना अउ प्रसारण मंत्रालय के केंद्रीय संचार ब्यूरो क्षेत्रीय कार्यालय जगदलपुर कोति ले बस्तर जिला के विकासखंड तोकापाल के सिंघनपुर गांव म आज राष्ट्रीय पोषण माह म बिसेस प्रचार कारीकरम होइस। जेमा जनपद सदस्य सुभाष बघेल के संगेसंग कतकोन जनप्रतिनिधि, अधिकारी, कर्मचारी अउ ग्रामीण मन सामिल होइन। ए बेरा म पोषण आहार के महत्व के बारे म लोगन मन ल जानकारी देके संगेसंग रैली निकाले गीस अउ सांस्कृतिक कारीकरम घलो होइस। एखर बाद स्वास्थ्य सिविर लगाके ग्रामीण मनके स्वास्थ्य के जांच करे गीस अउ ओमन ल निसुल्क दवाई बांटे गीस।

जल-जगार महोत्सव

धमतरी जिला के रविशंकर जलासय गंगरेल म पांच अउ छै अक्टूबर के महानदी के तीर म जल-जगार महोत्सव होवइया हे। एमा जिला के एक सौ आठ अमृत सरोवर अउ कृत्रिम जलासय के पानी ले अभिषेक करे जाही। संगेसंग लोगन मन ल पानी बचाय बर घलो प्रोत्साहित करे जाही।

जानबा के अनुसार जिला म भू-जल स्तर बढ़ाय म अउ पर्यावरण ल बचाय खातिर कतकोन कारीकरम करे जात हे, जेमा माईलोगिन मन ह घलो बड़-चढ़के हिस्सा लेवत हे।

सरपंच—निलंबित

जशपुर जिला के पथलगांव जनपद पंचायत के ग्राम पंचायत छातासराई के सरपंच सावित्री नाग ल निलंबित कर दे गेहे। पथलगांव के एसडीएम ह पइसा के हेरफेर के आरोप म ए कदम उठाय हे। उहें, पंचायत सचिव नीलाम्बर यादव के खिलाफ घलो निलंबन अउ गबन रासि वसूली के कार्रवाई करे गेहे।

सक्ती—फर्जी बैंक शाखा

सक्ति जिला के छपोरा गांव म भारतीय स्टेट बैंक के फर्जी साखा खोल के लगभग छै झिन मनखे ल नौकरी देके ठगी करे के मामला आगू आय हे। सिकायत मिले के बाद स्टेट बैंक के क्षेत्रीय अधिकारी ह जब उंहा पहुंचिन तब एखर खुलासा होइस। एखर बाद ए जानकारी पुलिस ल दे गीस। पुलिस ह बतइन हे कि एमा तीन झिन लोगन के नाव आगू आय हे, जेखर खिलाफ कार्रवाई करे जात हे।

जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम “जिले की चिट्ठी” के प्रसारण काली संज्ञा छै बजके 5 मिनट ले छै बजके 10 मिनट तक करे जाही। ए कारीकरम ल प्रदेस के जम्मा आकाशवाणी केंद्र मन ह एके संघरा रिले करही। ए बखत के अंक म “मोहला—मानपुर—अंबागढ़ चौकी” जिला के गतिविधि के बारे म जानकारी दे जाही।

हल्बी / गोण्डी—समाचार बुलेटिन

सुनइया मन ल बतादन कि काली ईतवार के “हल्बी” अउ “गोण्डी” बोली म समाचार बुलेटिन प्रसारित करे जाही। ए दूनों बुलेटिन आकाशवाणी केंद्र, जगदलपुर ले प्रसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे ले अउ गोण्डी म समाचार बुलेटिन संझा साढ़े छै बजे ले प्रसारित करे जाही।

शेखर चंदेल—शव बरामद

जांजगीर—चांपा स्काउट गाइड के जिला मुख्य आयुक्त अउ भाजपा नेता शेखर चंदेल के शव ह जांजगीर के रेलवे स्टेसन करा मिले हे। शेखर चंदेल डहार ले ट्रेन ले कट के आत्महत्या करे जाय के आसंका जताय जात हे। फिलहाल मौत के वजह के पता नइ चल पाय हे, फेर पुलिस ह मामला के जांच करत हे। ओमन ह पूर्व नेता प्रतिपक्ष अउ भाजपा नेता नारायण चंदेल के भाई रिहीस।
